

essentiam earum, formâ liquoris, elicit. Sic in humano corpore, cum ἀναθυμιάσεις ex inferioribus partibus, in aëream microcosmi plagam, tanquam in alembicum, efferruntur: ejus frigore, in excrementum pituitosum & mucosum condensantur: unde postea perennis ejus in nares, palatum, aut alias corporis partes, fit destillatio & defluxio. Hinc fit: quòd in ciborum elixatione ollas operculo claudamus, ut quidquid vaporum in aquam concrevit, in suam originem postliminiò revertatur. Et quando dapum calorem fovere volumus; patinas, quibus eæ apponuntur, aliis cooperimus paropsidibus: unde vapores ciborum, ab illarum ἀνίστησις frigida incrassati, globatim delabuntur.

Estq; Destillatio, pro diverso vasorum positu, ut alias multas differentias taceam, vel Recta vel Obliqua. Illa fit per alembicum, aut vesicam; hæc per retortam, in rebus præsertim spiritus contumaciores foventibus.

*Ex diversitate materierum etiam diversa separandi ratio inventa, & ne huic arti aliquid deesset, artifices varios destillandi modos*